

An Exposition of the Seven Church Ages

Chapter Two

Emonaneli ya Patmos

Yoane na Patomo (Emoniseli 1 : 9-20)

Emoniseli 1: 9,

"Ngai Yoane, ndeko na bino, oyo azali kokabola elongo na bino mpasi, bokonzi mpe motema molai kati na Yesu Klisto, nazalaki kati na esanga oyo ebengami Patamo, na ntina na Liloba na Nzambe, mpe na litatoli ya Yesu Klisto."

Molongó ya bimonaneli ya Emoniseli ya Yesu Klisto epesamaki epai na Yoane ntango atyamaki lokola na boloko na Esanga ya Patamo." Esanga moke oyo ezali kati na Mbu Égéé, na bakilometele ntuku mitano ya Azia Moke. Yango ezalaki mabangamabanga mpe etondaki na banyoka, miselekete mpe bankotó, ezalaki na motuya mingi te na oyo etali mombongo, yango wana Bokonzi ya Roma ezalaki kosalela yango lokola boloko mpo na bato ya mobulu makasi, bakangami ya makambo ya politiki, mpe bongo na bongo.

Bokomona ete Yoane alobaki na ntina na ye moko epai na Baklisto lokola ndeko kati na mpasi. Ezalaki na ntango yango nde lingomba ya ebandeli ezalaki koleka kati na minyoko minene. Bazalaki bobele "koloba mabe na ntina na losambo na bango bisika nyonso te", kasi bato bazalaki mpe kokangama na boloko mpe kobomama. Yoane, lokola Baklisto mingi mosusu, akangamaki sikawa na bolóko na ntina na Liloba na Nzambe mpe na litatoli ya Yesu Klisto. Ntango bakangaki ye, batokisaki ye kati na mafuta mpo na ngonga ntuku mibale na minei mpo na koboma ye; kasi balongaki te. Lokola bazangaki makoki, bakonzi ya leta batondaki na nkanda mpe batindaki Yoane na esanga ya Patamo lokola ndoki. Kasi Nzambe azalaki elongo na ye, bongo ye akokaki kolongwa na esanga mpe kozonga na Efese epai wapi akobaki mosala na ye mokengeli kino na ntango ya liwa na ye.

Bimononeli oyo Yoane azuaki esalemaki na boumeli ya mibu mibale; mobu 95 ná 96 sima na liwa ya Klisto. Ezali mpenza bimononeli ya kokamwa kati na bimononeli nyonso ya Liloba. Buku mobimba ekomami na bilembo, yango wana bato balobelaka mpe bawelanaka mingi na ntina na yango . Ata bongo, yango ezali na elembo ya Nzambe likolo na yango. Oyo ezali kokómisa yango buku ya solosolo mpe ya motuya monene epai na baoyo batángaka to bayókaka makambo oyo ekomami kati na bankasa na yango ya bulee.

KATI NA MOLIMO NA MOKOLO NA NKOLO

Emoniseli 1: 10,

"Namemamakai na Molimo na mokolo na Nkolo, bongo nayokaki nsima na ngai mongongo mokasi, lokola kelelo."

Namemakai kati na Molimo." Ezali mpenza kitoko , boye te? Oh, nalingi yango. Okoki bobele koloba ete maloba yango ezali "Motindo ya bomoi ya Boklisto." Soki tolingi kobika lokola Baklisto, tosengeli kozala kati na Molimo na YE. Yoane azalaki koloba te na ntina ya kozala kati na molimo na ye moko. Wana elingaki komema bimononeli yango te. Esengelaki kozala Molimo na Nzambe. Esengeli mpe kozala Molimo na Nzambe elongo na biso, soki te makasi na biso nyonso ezali mpamba. Polo alobaki: "Nakobondela kati na Molimo, nakoyemba kati na Molimo, nakobika kati na Molimo." Soki ezali na likambo moko ya malamumu oyo ekokomela ngai, yango esengeli komonisama na Molimo, kondimisama na Liloba, mpe kotalisama polele na mbano na yango. Ndenge kaka Yoane asengelaki kokota na Molimo mpo na kozwa bimoniseli ya motuya kouta na Yesu, tosengeli kozala na kati na Molimo mpo na kososola bimoniseli oyo Nzambe apesi biso na Liloba na Ye, mpo ete tobika na nzela na yango, mpo ezali Molimo moko wana.

Bokanisa naino; Bato mimgi batangaka Biblia, esika ekomami na Misala 2: 38,

"Bobongola mitema, mpe bobatisama moko na moko na bino na Nkombo na Yesu Klisto mpo na kolimbisama ya masumu na bino, mpe bokozua likabo ya Molimo Mosantu, "

mpe bazali mpenza kolela likolo na yango. Bazali komona yango te. Soki bámonaka yango, na kokótáká kati Molimo, balingaki koyeba ete soki balingi koyamba Molimo Mosantu, basengeli kobongola mitema mpe kobatisama na Nkombo na Nkolo Yesu, mpe na sima, Nzambe alingaki kozala na mokumba ya kokokisa Liloba na Ye na kotondísáká bango na Molimo Mosantu. Bango bakótaka ata moke te kati na Molimo na Ye, soki bongo elingaki kokomela bango bobele ndenge Liloba elobi. Bóbondela Nzambe mpo na emoniseli na nzela ya Molimo na Ye. Wana nde litámbé ya liboso. Kota kati na Molimo.

Tika nápésa ndakisa mosusu. Toloba ete ozali na bosenga ya lobiko na nzoto. Liloba elobi nini? Ee,

biso nyonso totánga yango mbala mingi, kasi tokóki kati na Molimo te ntango tozalaki kotanga yango. Biso tosengaki nde na Nzambe ete ateya biso, na nzela ya Molimo na Ye, bosolo mpenza na yango? Soki tósálaki yango, tolingaki kobenga bampaka, koyambola masumu na biso, kopakolama na mafuta mpe kobondelama, mpe esuki wana. Ntango mosusu ekokokisama mbala moko te, kasi na Molimo na Ye, nyonso esili kokokisama. Esambiselo mosusu ezali te. Nzambe akokokisa Liloba na Ye. Oh, tosengeli kokota kati na Molimo, mpe na nsima, makambo makosalema. BÓBANDAKA NA MISALA TE. BOKOTA KATI NA MOLIMO MPE NA SIMA BÓSALA MISALA BONGO BOTALA OYO NZAMBE AKOSALA.

Bosílá komona ndenge mokili ekotaka kati na molimo ya makambo oyo ezali kati na mokili? Bakendaka na masano nya ndembo, milulu na bango ya masano, mpe na mabina na bango. Bakotaka kati na molimo ya yango. Bafándaka wana te lokola bafololo oyo etyami na etutu, to lokola banzete oyo ekaúká. Bakotaka mpenza kati na yango mpe bakómaka eteni ya makambo yango. Kasi, oh, boni bango bayinaka Baklisto na ndenge bakotaka kati na Molimo ya Liloba na Nzambe. Babengaka biso balandilandi, bato na molende mabe. Bango bakoki kosala nyonso mpo na kotalisa koyina mpe bozangi kosepela na bango. Kasi bino botala yango te. Bokoki komizela na yango, mpamba te boyebi esika yango ezali kouta. Bokoba kaka mpe bokóta kati na Molimo ya kosambela.

Molimo na biso ezali peto. Ezali sika. Ezali solo. Ezali kimya mpe ezali na ekegéné, kasi ata bongo, etondi na esengo ya Nkolo. Moklisto asengelaki mpe kozala na esengo mpe kotonda na bisengo kati na Nkolo kaka lokola mokili esepelaka na bisengo na yango. Baklisto ná bato ya mokili bazali bato; bango nyonso bazalaka na mayoki. Bokeseni ezali ete mitema mpe mayoki ya Baklisto etiami bobele likolo na Nkolo na Nkembo mpe na bolingo na Ye, nzokande mokili ezali kosepelisa nzoto.

Sikawa elobami ete Yoane azalaki kati na Molimo na Mokolo na Nkolo,

Ô! la la!, botala eteni ya makomi oyo ezali mpenza kobimisa bokabwani. Nzokande esengelaki kozala bongo te, kasi bato mosusu bazali mpenza komona te eloko Liloba elobi solo.

Yambo tozali komona bato ya malamumu oyo babengamaka Mokolo ya Nkolo, Mokolo ya Sabata; mpo na bango ezali mokolo mwa Mpóso. Bongo, basusu babengaka Mokolo na Nkolo Mokolo ya Lomingu; Lomingu, mokolo ya liboso ya mpóso. Kasi ndenge nini yango ekoki kozala moko ya mikolo oyo, to ata soki botie yango mibale esika moko, mpamba te Yoane azalaki kati na Molimo ntango azwaki bimonaneli yango na boumeli ya mibu mibale. Nzokande likambo oyo esalemaki ezalaki ete Yoane azwamaki na Molimo mpe amemamaki kati na Mokolo na Nkolo, yango esengeli naino ekoya. Biblia ezali koloba na ntina na Mokolo na Nkolo, oyo esengeli koya, mpe Yoane azali sikawa komona makambo maye masengeli kosalema na mokolo yango. Kasi liboso, bobele mpo na kovandisa makanisi na biso, tika toluka koyeba malamumu-malamumu oyo Sabata ezali lelo.

Sabata, na ndenge toyebi yango uta na Kondimana na Sika, ezali TE bobateli ya mokolo moko boye. Tozali soko moke te na etinda ya kobatela mokolo na Mpóso lokola Sabata, tozali mpe na mobeko moko te ya kobatela mokolo ya liboso ya mpóso, oyo ezali mokolo ya Lomingu. Botala bosolo ya Sabata, yango elingi koloba "bopémi." Baebele 4: 8: "Mpamba te, soki Yosua àpésaka bango bopemi (to mokolo ya kopema), wana Nzambe alingaki lisusu te koloba na ntina na mokolo mosusu. Yango wana bopemi moko etikali (bobateli ya Sabata) mpo na bato na Nzambe. Mpamba te moto oyo akoti kati na bopemi ya Nzambe apemi na misala na ye, mpela moko Nzambe apemaki na misala na Ye. " Bino boyoki maloba wana ya motuya na eteni ya suka ya molongo? "Nzambe apemaki na misala na Ye moko." Nzambe apesaki Yisalaele mokolo na nsambo lokola Sabata na bango, mpo na ekaniseli ya mosala na Ye moko, wapi Akelaki mokili mpe nyonso oyo ezalaki kati na yango, bongo na nsima Atikaki kokela. Apemaki na misala na Ye. Ye apemaki. Sikawa, ezalaki malamumu kopesa bopemi ya Sabata na bato oyo bazalaki bango nyonso na esika moko na ntango moko, na bongo bakokaki kobatela mokolo moko boye. Lelo, ndambo ya mokili ezali kati na pole ntango ndambo mosusu ezali kati na molili, na bongo ekotambola ata moke te. Kasi wana ezali bobele likanisi moko uta na mokili.

Tótala likambo oyo Biblia ezali koteya biso na ntina na bopemi ya Sabata. "Mpo na ye oyo akoti kati na bopemi na ye." Kokota yango ezali bobele kokota na kati te, kasi kotikala na kati, bopemi. Ezali 'bopemi ya seko' oyo mokolo ya nsambo ezali bobele etaliseli. Nsambo ezali bosukisi. "Mwambe" ezali lisusu mokolo ya "liboso". Lisekwa ya Yesu ezalaki na mokolo ya liboso ya póso, oyo ezali kopesa biso bomoi na Seko mpe bopemi ya Sabata ya seko. Na yango tozali komona mpo na nini Nzambe akokaki te kopesa biso mokolo moko boye ya póso lokola Sabata (bopemi). "Tokoti kati na" mpe tozali mpenza "kotikala kati na" bopemi na biso, oyo Yisalaele akokaki kosala te mpo bazalaki bobele na elílingí ya ndimbola ya solosolo oyo biso tozali kosepela na yango. Mpo na nini kozonga na elilingi na ntango tozali sikawa na solo?

Lolenge nini tozali koyamba bopemi oyo to Sabata oyo ya libela, ezali na mbela naYesu. Alobaki na Matai 11: 28-29,

"Boya epai na Ngai, bino nyonso oyo bolembi na mikumba; Ngai nakopesa bino bopemi. Bókamata ekanganeli na Ngai likoló na bino mpe bóyekola na Ngai.

...mpe bokozwa bopemi (elingi koloba kobatela Sabata, mokolo moko boye te, kasi Bomoi na Seko, sabata) na milimo na bino. "

Ata soki esali mbula boni oyo ozali komona mpasi na nse ya mokumba na yo ya masumu, ézala mbula zomi, mbula ntuku misato to mbula ntuku mitano, to koleka; mema bomoi na yo ya bolembu epai na Ye mpe okozwa bopemi na Ye (sabata ya solo). Yesu akopesa yo bopemi.

Sikawa, bopemi oyo Yesu akopesa yo ezali mpenza nini? Yisaya 28:8 -12,

"Zambi mesa nyonso etondi na bisanza mpe bosoto, na lolenge ete esika ya peto ezali te.

Akoteya boyebi epai na nani? mpe akosalisa nani mpo ete asosola mateya? epai na baoyo bakilisami na libele, balongolami mpe na mabele na mama?

Mpo ete ezali lilako likolo na lilako, lilako likolo na lilako; molongo likolo na molongo, molongo likolo na molongo; awa mwa moke mpe kuna mwa moke:

Mpo na bibebu oyo ezali kokakatana mpe na lokota ya bapaya nde Nzambe akoloba na bato oyo.

Alobaki na ye ete, Oyo nde bopemi (Sabata), mpo na kopemisa moto oyo alembi (kobatela Sabata na Ye); yango nde bopemi: nzokande balinaki koyoka te."

Yango oyo, esakolami awa na Yisaya. Mpe yango ekokisamaki na nsima na ba-mibu soko mkama nsambo na Pantekote ntango batondisamaki na Molimo Mosantu mpenza mpenza ndenge esakolamaki. Oyo nde Sabata ya solo oyo elakamaki. Boye ntango batondisamaki na Molimo Mosantu, batikaki misala na bango ya mokili, makambo na bango ya mokili, banzela na bango ya mabe. Molimo Mosantu azwaki mokumba ya bomoi na bango. Bakotaki kati na bopemi. Yango nde bopemi na yo. Wana nde Sabata na yo. Ezali mokolo moko boye te, mobu moko boye mpe te, kasi boseko ya kotondisama mpe kopambolama na Molimo Mosantu. Ezali yo kotika, mpe Nzambe azali kosala. Ezali Nzambe kati na yo, kokokisa mpe kosala oyo ezali mokano na Ye mpenza.

Tika ete náloba lisusu likambo moko na ntina na bato oyo babatelaka mokolo ya mposo, baoyo balobaka ete biso toanganaka na mokolo ya mabe ya póso ntango tokutanaka na mokolo ya Lomongo, mokolo ya liboso. Botala likambo Justin alobaki na ekeke ya mibale. "Na mokolo ya Lomongo, likita moko esalemaki mpo na bafandi nyonso ya bingumba mpe ya bamboka, bongo eteni moko ya masolo ya bantoma etangamaki na ntango nyonso oyo nzela epesamaki. Ntango botángi esili, mokambi, kati na maloba apési toli mpe elendiseli na bato mpo ete bámekola makambo wana ya lokumu. Nsima na yango, biso nyonso totelemi mpo na kosala libondeli elongo. Na suka ya libondeli, ndenge tolobaki, lipa ná vinyo etiamaki liboso na biso, bongo matondi epesamaki mpe lisangá mobimba ezongisaki : "Amen". Na sima, kominyo ekabolamaki na moko na moko mpe eliamaki, mpe ememamaki na basungi na bandako ya bato oyo bazalaki te. Bato ya bozwi mpe baoyo balingi bazali na sima kopesa makabo na kolanda bonsomi na bango moko, bongo bazali kopesa makabo yango epai na mokambi mpe ye azali kosalela yango mpo na kosunga bana bitike, basi oyo bakufelá mibali, bakangami mpe bapaya oyo bazali na bozangi. . " Na yango tozali komona ete baoyo balobaka ete lingomba ya ebandeli ezalaki kokóba na mimesano ya Bayuda ya kosangana na mokolo ya suka ya póso, bazangi mpenza boyebi ya makambo oyo mambi ma kala ezali kolakisa, mpe yango wana babongi kotyelama motema te.

Oh, bato báyá epai na Ye mpe bázwa bopemi wana! Mposa ya bopemi wana ezali kati na mitema nyonso, kasi mingi kati na bangon bayebi eyano te. Na bongo bazali komeka kosilisa mposa yango na nzela ya milulu ya losambo ya kobatela mikolo moko boye to ya koyamba bindimeli mpe mateya ya lokuta ya bibongiseli. Kasi na kozanga kolonga na likambo yango, bato mingi bazali komeka komela, kosala milangwa, kolekisa ndelo nyonso ya nzoto, bazali kokanisa ete na nzela na bisengo ya mokili, ekoki kozala na mwa bosepeli. Kasi kati na makambo ya boye bopemi ezali te. Bazalaki komela makaya mpe komela bankisi mpo na kopesa kimia na misisa na bango. Kasi bopemi ezali te na bankisi ya mokili oyo. Bazali na bosenga na Yesu. Basengeli na nkisi ya likolo, bopemi ya Molimo.

Na sima, bato mingi kati na bango bakendaka na losambo na mokolo ya Lomongo. Ezali malamú, kasi ata kuna, bayebi ata te lolenge ya kobelema na Nzambe mpe ndenge ya kosambela Ye. Yesu alobaki ete losambo ya solo ezali kati na Molimo mpe na sembo, Yoane 4: 24. Kasi lolenge nini ya kosambela okoki kozwa na lingomba oyo eyebi mpenza moke na ntina na Nzambe, ezali kotya Saint Nicolas na Noele mpe basimbiliki na Pasika? Bazui yango wapi? Bazwi yango na bapakano mpe bakotisi yango kati na mateya ya lingomba. Kasi ntango moto abaluki epai na Nkolo mpe atondisami na Molimo Mosantu, akotika makambo nyonso ya lolenge wana. Azali na bopemi kati na bomoto na ye ya kati. Abandi mpenza kobika, kolinga Nzambe mpe kosambela Ye.

Sikawa, tózonga na Makomi na biso. Toyebi oyo Mokolo na Nkolo ezali te. Soki yango ezali mokolo na Mposo to ya Lomongo te, ezali nini? Ee, tóloba yango boye. Lelo ezali solo mpenza Mokolo na Nkolo te.

Oyo ezali mokolo ya moto. Moto nde azali kosala, mosala ya moto, lingomba ya moto, likanisi ya moto mpo na kosambela, nyonso ya moto, mpo ezali mokili ya moto (molóngó). KASI MOKOLO NA NKOLO EZALI KOYA. Iyo, ezali bongo. Ezali bobele ete na ntango ya Emoniseli ya Yesu Klisto, Yoane azwamaki na Molimo mpe amemamaki na Molimo kino na Mokolo Monene wana oyo ezali koya. Mokolo na Nkolo ezali ntango mikolo ya moto esili. Makonzi ya mokili oyo ekokóma na ntango yango makonzi ya Nzambe na biso. Mokolo na Nkolo ezali ntango kosambisama ekokweya, mpe nsima na yango bokonzi na mbula nkóto ekoya. Sikawa, mokili ezali kosala oyo elingi kosala na moklisto. Bazali kobenga ye na bankombo nyonso ya mabe, bazali kotyola ye. Kasi mokolo wana monene mpe ya ntina ezali koya, mokolo oyo bakolela mpe bakoganga, mpamba te Mwana na mpate akoya na nkanda mpo na kosambisa mokili. Na ntango yango bayengebeni bakozala na eleko na bango elongo na Nkolo, mpo bato mabe bakozika mpe bayengebeni bakotambola likolo na mputulú na bango mpo na kokóta na bokonzi ya mbula nkóto. Malaki 3: 21,

"Mpe bokonyata bato mabe mpamba te bakozala lokola mputulú na nse ya makolo na bino, na mokolo oyo Nazali kobongisa, Yawe na bibebe alobi bongo."

MONGONGO LOKOLA KELELO

Emoniseli 1: 10,

"... bongo nayokaki na nsima na ngai mongongo makasi lokola kelelo."

Yoane azalaki kati na Molimo, mpe ntango azalaki kuna, amonaki mokolo monene mpe kitoko ya Nkolo Yesu mpe nguya na Ye nyonso ya bulee. Mikolo ya sima elingaki kosalema mpamba te Nzambe abelemaki mpo na koteya ye. Yoane alobaki te ete ezalaki kelelo. Ezalaki lokola kelelo. Sikawa ntango bayuli kelelo, etalisi ete likambo ya lombangu ezali. Ezali lokola momemi nsango, motindami ya mokonzi, azali koya epai na bato. Azali koyula kelelo. Ezali libiangi ya nokinoki. Bato basangani mpo na koyoka. (Yisalaele bazalaki ntango nyonso kosangana na mongongo ya kelelo.) Likambo moko ya motuya ebelemi. "Boyoka yango." Na yango, mongongo yango ezalaki na lombangu ya kobenda likebi ndenge moko na kelelo. Ezalaki koyokana polele mpe makasi, ezalaki kokamwisa mpe kolamwisa. Oh, tika tokoka koyoka mongongo ya Nzambe lokola kelelo lelo, mpamba te ezali Kelelo ya Nsango Malamu oyo ezali koyula Liloba ya Lisakoli mpo na kokebisa biso mpe kolengela biso mpo na oyo ezali koya na mokili.

ETINDA YA KOKOMA

Emoniseli 1: 11,

"Koloba : Nazali Alifa mpe Omega, Moto ya Liboso mpe ya Nsuka. Makambo oyo ozali komona, koma yango na buku mpe tinda yango na Mangomba nsambo oyo ezali na Azia : na Efese, mpe na Sumuluna, mpe na Pelegamo, mpe na Tyatira, mpe na Saladi, mpe na Filadelefia, mpe na Laodikia."

Yango oyo. Ebandeli mpe Nsuka, Alifa mpe Omega: elingi koloba NYONSO . Nzambe moko ya solo. Mongongo mpe Liloba na Nzambe. Makambo yango ya solo mpe bosolo yango ebelemi. Ezali likambo monene kozala kati na Molimo. Oh, la la! kozala liboso na Nzambe mpe koyoka Ye koloba... "Oyo ozali komona, koma yango na buku, mpe tinda yango na mangomba nsambo." Mongongo oyo eyokisaki Liloba na Ye na Elanga ya Edene mpe likolo na Ngomba Sinai. Mongongo yango eyokanaki mpe kati na nkembo monene ya Ngomba ya Mbongwana, eyokanaki lisusu; mbala oyo na mangomba nsambo ná emoniseli mobimba mpe ya nsuka ya Yesu Klisto.

"Koma bimononeli, Yoane. Komá yango na mokanda mpo na bileko oyo ekoya na nsima, mpamba te yango ezali bisakweli ya solo oyo esengeli kokokisama. Komá yango mpe tindá yango, yebisá yango epai na bato. "

Yoane ayebaki mongongo yango. Oh, soki ozali moko ya baoyo ya Ye, okoyeba mongongo yango ntango Akobenga.

BITELEMISELI YA MIINDA YA WOLO

Emoniseli 1: 12,

"Nabalukaki mpo na komona mongongo oyo elobaki na ngai. Mpe wana nabalukaki, namonaki bitelemiselo nsambo ya miinda, ya wolo."

Yoane alobi te ete abalukaki mpo na komona moto oyo ye ayokaki mongongo na ye, kasi abalukaki mpo na komona mongongo. Oh, nalingi yango. Abalukaki mpo na komona mongongo. Mongongo mpe moto yango ezali bobele eloko moko. Yesu azali LILOBA. Yoane 1: 1-3,

"Na ebandeli Liloba azalaki, mpe Liloba azalaki elongo na Nzambe, mpe Liloba azalaki Nzambe."

Azalaki wuta na ebandeli elongo na Nzambe.

Biloko nyonso esalemaki na Ye, mpe eloko moko te oyo esalemá ezangá kosalema na Ye."

Soki okoki mpenza komona Liloba, okomona Yesu.

Ntango Yoane abalukaki, amonaki bitelemiseli nsambo ya babuji ya wolo. Kutu ezalaki bitemelo ya miinda. Mpe na kolanda molongo ya 20, ezali mangomba nsambo: "Bitemeli nsambo ya babuji oyo omoni bizali mangomba nsambo." Mpo na kotalisa mangomba, bakoki mpenza te kozala babuji. Buji epelaka kaka mpo na mwa ntango mpe na nsima esilaka. Ekufaka. Ekozala lisusu te. Kasi etelemiselo ya miinda ezali na libongi moko oyo ezwamaka kati na buji te.

Soki olingi kozwa elilingi kitoko ya mwinda, tanga na ntina na yango na Zekalia 4:1-6,

"Mpe mwanje oyo asololaki na ngai Ayaki lisusu, mpe alamusaki ngai lokola moto oyo balamusu na mpangi.

Mpe alobaki na ngai ete, Ozali komona nini? Bongo nayanolaki : "Natali, mpe talá etelemiselo ya mwinda oyo esalemi na wólo, ná mbeki moko likoló na yango, ná miinda na yango nsambo likoló na yango, mpe batiyo nsambo oyo elekisaka mafuta kino na miinda oyo ezali likolo na yango.

Mpe banzete mibale ya miwiti pembeni na yango, moko na ngámbo ya loboko ya mobali ya mbeki, mpe mosusu na ngámbo na yango ya loboko ya mwasi.

Bongo nayanolaki mpe nalobaki na mwanje oyo azalaki kosolola na ngai, nalobaki ete: "Nkolo na ngai, oyo ezali nini?"

Bongo mwanje oyo azalaki kosolola na ngai ayanolaki mpe alobaki na ngai ete: "Oyebi te soki makambo yango ezali nini?" Mpe nalobaki: Te, Nkolo na ngai.

Bongo ayanolaki mpe alobaki na ngai : Oyo ezali Liloba ya Nkolo epai na Zorobabele : Ezali na makasi te, to na nguyu te, kasi na Molimo na Ngai, ' elobi Yawe na Bibebe."

Talá mwinda mosusu ya wolo ya peto. Ezali kopela makasi mpamba te ezali na mafuta mingi oyo ezali kouta na banzete ya eláya mibale, oyo eteleme na ngámbo nyonso mibale na yango. Banzete wana mibale ezalaki kotalisa Kondimana na Kala mpe Kondimana ya Sika, mpe na ntembe te mafuta ezali kotalisa Molimo Mosantu, bobele Ye nde akoki kopesa na bato pole ya Nzambe. Mwanje oyo asololaki na Zakalia azalaki koloba na bokuse boye : "oyo bozali komona elingi koloba ete lingomba ekoki kokokisa eloko moko te na makasi to na nguyu na yango moko, kasi na Molimo Mosantu."

Sikawa totala etelemiselo ya miinda oyo. Bokomóna ete yango ezali na mbeki moko monene, to ebómbelo, batiyo to banzela nsambo ezali kobima wuta na yango. Mbeki yango etondi na mafuta ya eláya oyo ezali koleka na kati ya bansinga nsambo oyo etyami na banzela wana nsambo. Ezali kaka mafuta yango nde ezali kopela mpe kobimisa pole na nsuka ya batiyo wana nsambo. Pole yango ezali kokufa soko moke te. Mbala na mbala, banganga-nzambe bazalaki kosopa mafuta kati na mbeki.

Mwinda yango ezalaki kopelisama na lolenge moko boye. Yambo, nganga-nzambe azalaki kozwa móto na etumbelo ya bulee oyo na ebandeli epelisamaki na móto ya Nzambe. Azalaki kopelisa liboso mwinda oyo ezalaki likolo ya mbeki. Na nsima, azalaki kopelisa mwinda ya mibale na móto ya mwinda ya liboso. Mwinda ya misato ezwaki móto na yango na mwinda ya mibale, ndenge moko mpe oyo ya minei ezwaki yango na oyo ya misato, mpe bongo na bongo kino miinda nyonso nsambo ezalaki kopela. Móto mosantu ya etumbelo, kolekaleka uta na mwinda moko kino na mwinda mosusu, ezali elilingi moko kitoko ya Molimo Mosantu kati na Bileko nsambo ya Lingomba. Kosopama ya ebandeli ya Pantekote (kosopama oyo eutaki mbala moko na Yesu, na Kiti ya Mawa) ezali kotambwisa Lingomba na Ye kati na bileko nyonso nsambo, mpe kolakisa malamumu mpenza ete Yesu Klisto azali ndenge moko lobi, lelo mpe libela, Nzambe oyo abongwanaka te kati na bomoto na Ye mpe na banzela na Ye.

Na Yoane 15, Yesu alobaki: "Ngai nazali Mobímbí, bino bozali bitape." Azali Mobímbí moboko, oyo ebimi na mosisa ya ebandeli uta na momboto ya ebandeli oyo ezali na bomoi kati na yango. Sikawa mobímbí ebotaka mbuma te; kaka bitape nde ebotaka yango. Sikawa botala malamumu likambo oyo: Okoki kozua nzete ya ndímo lokola nzete ya malala, mpe okotisi kati na yango mwa etape ya nzete ya plamplemusu, ya ndímo-ngayi, ya mandarini, mpe bitape mosusu ya lolenge wana; mpe bitape wana nyonso bikokóla. Kasi bitape yango oyo bokotisi bikobota malala te. Ata moke te. Etape ya ndimo-ngai ekobota ndimo-ngai, etape ya pamplemusu ekobota ba-pamplemusu mpe bongo na bongo. Nzokande bitape yango bikobenda bomoi na yango kati na nzete. Kasi soki nzete yango ebimisi etape mosusu ya yango moko mpenza, ekozala etape ya malala mpe ekobóta malala. Mpo na nini? Mpamba te bomoi oyo ezali na kati ya etape ná oyo ezali na kati ya mobímbí ekokani, kasi ezali bongo te mpo na bitape oyo batye kotya.

Bitape wana oyo bikotisamaki na nzete mosusu bizalaki na bomoi ya lolenge mosusu kouta na banzete mosusu, na misisa mosusu, na mimboto mosusu. Oh, bakobota mbuma, kasi bakobota malala te. Bakoki te, mpo bazali oyo ya ebandeli te.

Lingomba ezali mpe bongo. Bapasolaki mobímbí mpe bakotisaki bitape mosusu na kati. Bakotisaki bitape ya ba-Batiste, bitape ya ba-Methodiste, bitape ya ba-Presbiterien, mpe bitape ya ba-Pantekotiste. Bongo bitape yango ezali kobota mbuma ya ba-Batiste, ba-Methodiste, ba-Pantekotiste, mpe ya ba-Presbiterien. (Mimboto ya bibongiseli esika mbuma na bango ezali kouta.) Kasi soki mobímbí ebimisi etape mosusu ya yango moko, etape yango ekozala mpenza lokola mobímbí yango moko. Ekozala kaka lokola etape oyo ebimaki na Pantekote. Ekoloba minoko na sika, ekosakola, mpe ekozala na nguya mpe bilembo ya Yesu Klisto oyo asekwi kati na yango. Mpo na nini? Mpo ete ezali kokóla na biloko kouta na mobímbí yango moko. Bomoni, etyamaki kati na Mobímbi te; EBOTAMAKI na mobímbi. Na ntango bitape wana mosusu bityamaki, bakokaki bobele kobota mbuma na bango moko mpamba te babotamaki na nzete wana te. Bayebi eloko te na ntina na bomoi wana ya ebandeli mpe mbuma ya ebandeli. Bakoki koyeba te mpo babotamaki na yango te. Kasi soki bábótamaka uta na yango, bomoi moko wana oyo ezalaki na mobímbí ya ebandeli (Yesu) elingaki koya na nzela na bango mpe komonisama na nzela na bango. Yoane 14: 12,

"Solo, solo, Nazali koloba na bino, Ye oyo andimi Ngai, misala Nazali kosala akosala yango lokola; mpe ye akosala misala minene koleka oyo; mpo ete Nazali kokende epai na Tata na Ngai."

Bibongiseli oyo ezali kotambwisama na bato bakoki kobotama na Nzambe te; mpo ezali Molimo, MOTO TE, nde apesaka bomoi.

Ezali mpenza esengo kokanisa ete miinda nsambo wana ezalaki kozwa bomoi mpe pole na kati ya mbeki monene wana, mpo bansinga ya miinda yango ezindisamaki na kati na yango. Momemi-nsango ya eleko ya lingomba moko na moko atalisami awa. Bomoi na Ye ezali kopela móto na Molimo Mosantu. Nsinga na ye (bomoi) esili kozindisama kati na Klisto. Na nzela ya nsinga yango, ye azali kobenda bomoi mpenza ya Klisto, mpe na nzela na yango azali kopesa pole na lingomba. Pole ya lolenge nini azali kopesa? Pole kaka moko oyo ezalaki na mwinda ya liboso oyo epelismaki. Mpe na boumeli ya bileko kino lelo oyo na ntango ya motindami ya ntango na nsuka, bomoi moko wana mpe pole moko wana ezali komonisama na nzela ya bomoi oyo ebombami elongo na Klisto kati na Nzambe.

Tokoki koloba bongo bobele mpo na batindami te, kasi mondimi nyonso ya solo atalisami na ndenge ya kokamwa awa. Bango nyonso bazali kobenda bomoi na liziba moko. Bango nyonso bazindisamaki kati na mbeki moko. Bakufi na bango moko mpe bomoi na bango ebombami elongo na Klisto kati na Nzambe. Batiámi elembo kati na Molimo Mosantu. Baefese 4: 30,

"Mpe boyokisa Molimo Mosantu ya Nzambe mawa te, oyo na yango botyami elembo mpo na mokolo ya lisiko."

Moto moko te akoki kolongola bango na loboko na Ye. Moto moko te akoki kobebisa bomoi na bango. Bomoi ya libanda ezali kopela mpe kongenga, kopesaka pole mpe komonisama ya Molimo Mosantu. Bomoi ya kati, oyo emonanaka te ebombami kati na Nzambe mpe eleisami na Liloba ya Nkolo. Satana akoki kosimba bango te. Ata kufa ekoki kosimba bango te, mpo kufa ebungisi etengu na yango; nkunda ebungisi elonga na yango. Matondi ezonga epai na Nzambe, bazali na elonga oyo na kati mpe na nzela ya Nkolo Yesu Klisto. Amen mpe amen.

AZALI NGANGA NZAMBE LISUSU TE

Emoniseli 1: 13,

"Na katikati ya bitelemiselo ya miinda nsambo, ezalaki na moto moko lokola Mwana na Moto, alatakii elamba molayi kino na makolo, mpe mokaba moko ya wolo zingazinga na ntolo na Ye."

Ye wana ateleme, Moko lokola Mwana na moto. Lokola kitoko ya biju emonanaka ntango etyami na lopete, ndenge moko mpe Ye akumisami kati na mangomba. Ezali Mokolo ya Nkolo; mpo Yoane amoni Ye ateleme, lokola nganganzambe te, kasi lokola Mosambisi oyo azali koya. Mokaba ya wolo ekangami lisusu te na loketo esika oyo nganganzambe asengeli kolata yango wana azali kosalela Nzambe na Esika Eleki Bulee, kasi ezali sikawa zingazinga ya mapeka na Ye, mpo ete Azali sikawa nganga-nzambe te kasi MOSAMBISI. Sikawa Yoane 5: 22 ekokisami,

"Mpo Tata asambisaka moto te, kasi apesi bosambisi nyonso epai ya Mwana."

Mosala na ye esili. Bonganga-nzambe esili. Mikolo ya lisakoli esili. Ateleme na mokaba lokola MOSAMBISI.

NKEMBO NSAMBO YA BOMOTO NA YE.

Emoniseli 1: 14-16,

"Motó mpe nsuki na Ye ezalaki mpembe lokola léne, mpembe makasi lokola matandalape; mpe miso na Ye ezalaki lokola móto oyo nezali kopela makasi.

Mpe makolo na Ye ezalaki lokola motako oyo euti kobimisama na litumbu na móto; mpe mongongo na Ye lokola lokito ya mai monene.

Mpe na loboko na Ye ya mobali Asimbaki minzoto nsambo; mpe uta na monoko na Ye, mopanga mopeli na ngambo mibale ezalaki kobima; mpe elongi na Ye ezalaki lokola moi na ntango engalaka na makasi na yango nyonso.

Boni komonana ya Yesu esimbaki mpenza motema mpe epemelaki Yoane, oyo atindamaki na boloko na ntina ya Liloba, mpe tala, LILOBA ya Bomoi etele mi sikawa liboso na ye. Oyo nde emonaneli ya kongengisa, mpamba te elembo mokomoko ezali na ndimbola na yango. Oyo nde emoniseli ya Bozali na Ye ya nkembo!

1. Nsuki na Ye Mpembe lokola Matandala.

Likambo ya liboso Yoane amonaki mpe alobelaki ezalaki nsuki mpembe na Ye. Ezalaki mpembe mpe kongenga lokola matandala. Ezalaki te mpo na mbula na Ye. Oh, te. Nsuki mpembe makasi ezali komonisa mbula te, kasi makambo oyo moto abiki, bokomeli mpe bwanya. Oyo ya Seko akomaka mobange te. Ntango ezali nini mpo na Nzambe? Ntango ezali na ntina mingi te na miso ya Nzambe, kasi bwanya ezali na ntina mingi. Ezali lokola ntango Salomo asengaki Nzambe bwanya mpo na kosambisa bato ya Yisalaele. Sikawa Azali koya, Mosambisi ya mokili mobimba. Akolatisama motole ya bwanya. Yango nde nsuki ya mpembe mpe ya kongenga elingi koloba. Botala yango na Daniele 7: 9-14,

"Natalaki kino bakiti ya bokonzi etyamaki, mpe Mpaka oyo azala liboso ya ntango afandaki, elamba na Ye ezalaki mpembe lokola matandala, mpe nsuki ya motó na Ye ezalaki lokola nsuki ya mpate ya peto; kiti na ye ya bokonzi ezalaki kongenga lokola epeli na móto, mpe bapine na yango lokola móto oyo ezali kozikisa.

Ebale ya móto ezalaki kobima mpe kotambola liboso na Ye: nkoto na nkoto bazalaki kosalela Ye, mpe nkoto zomi mbala nkoto zomi batelemaki liboso na Ye: Basambisi bafandaki mpe babuku efungwamaki.

Bongo natalaki na ntina na maloba ya lofunfu oyo liseke yango ezalaki koloba; natalaki kino babomaki nyama, mpe nzoto na yango ebebisamaki mpe epesamaki na móto mpo ete ezikisama.

Kasi mpo na banyama mosusu, babotolaki bango bokonzi na bango, kasi bapesaki bango bomoi mpo na mwa ntango.

Namonaki na bimononeli na ngai ya butu, mpe talá, moto moko lokola Mwana na Moto koya na mapata ya likoló; apusanaki pene na Mpaka oyo azalá liboso ya ntango mpe bamemaki ye liboso na Ye.

Mpe bapesaki Ye boyangeli, mpe nkembo, mpe bokonzi ete bato nyonso, mabota mpe nkota nyonso basalela Ye. Boyangeli na Ye ezali ya seko na seko oyo ekoleka te, mpe bokonzi na Ye ezali oyo ekobebisama te. "

Yango wana mpenza. Daniele amonaki Ye na nsuki wana ya mpembe. Ye azalaki Mosambisi oyo afungolaki babuku mpe asambisaki uta na yango. Daniele amonaki Ye koya na mapata. Yango mpenza nde Yoane amonaki. Bango mibale bamonaki Ye mpenza ndenge moko. Bamonaki Mosambisi na mokaba na Ye ya kosambisa likoló na mapeka na Ye, atelemaki peto mpe mosantu, atondi na mayele, abongi mpenza mpo na kosambisa mokili na bosembo. Aleluya!

Ata mokili ezali kososola bilembo oyo, mpo na ntango ya kala mosambisi azalaki kobima mpe koyanganisa bato na esambiselo, azalaki kolata ekoti ya nsuki ya mpembe mpe elamba molai (kobanda na motó tii na makolo) oyo etalisaki ete azalaki na bokonzi nyonso mpo na kosambisa na bosembo.

2. Miso na Ye lokola Móto

Bókanisa naino. Miso wana oyo kala ezimamaki na mpisoli ya mpasi mpe ya mawa. Miso wana oyo elelaki na mawa na lilita ya Lazalo. Miso wana oyo emonanaki te mabe ya babomi oyo bakakisaki Ye na ekulusu kasi na mawa agangaki, "Tata limbisa bango." Miso yango ezali sikawa kongala na móto, miso ya Mosambisi Oyo akopesa mbano na baoyo baboyaki Ye.

Kati na mayoki nyonso ya bato, oyo Ye amonisaki mingi ntango Amonanaki lokola Mwana na Moto

ezalaki oyo: Azalaki kolela mbala mingi. Nzokande nsima ya kolela wana mpe ya mawa wana, Nzambe azalaki kaka wana.

Miso moko wana emonaki bimononeli. Ezalaki kotala na mozindo kati na mitema ya bato, etangaki makanisi na bango mpenza mpe eyebaki banzela na bango nyonso ya ndenge na ndenge. Sima na miso wana ya kufa ezalaki Nzambe, Oyo abelelaki na baoyo bayebaki Ye te mpo na oyo Ye Azalaki, "... Soko bokondima te ete Ngai Nazali Ye, bokokufa kati na masumu na bino. " Yoane 8: 24.

"Soki nazali kosala misala ya Tata na Ngai te, bondimela Ngai te. Kasi soki nazali kosala (misala ya Tata na Ngai), atako bondimi Ngai te, bondimela misala..."

Yoane 10: 37-38. Lokola Yilimia ya kala, Azalaki mosakoli oyo azalaki kolela, mpamba te bato bayambaki te Liloba na Nzambe mpe babwakaki emoniseli pembeni.

Miso wana oyo ezali kopela móto ya Mosambisi ezali kutu sikawa kokoma bomoi ya bato nyonso ya mosuni. Kotámboláká bisika nyonso na mokili mobimba, ezali na eloko moko te oyo Ye ayebi te. Ayebi bamposa ya motema mpe oyo moto na moto akani kosala. Ezali na eloko moko te ya sekele oyo ekozanga komonana, mpamba te makambo nyonso ezali bolumbu liboso na Ye oyo tokozongisa monoko mpo na makambo na biso. Bokanisa naino, Ayebi ata sikawa nini bozali kokanisa.

Iyo, Atelemi wana lokola Mosambisi na miso ya móto mpo na kopesa etumbu. Mokolo ya mawa esili. Oh, tika ete bato bábongola motema mpe baluka elongi na Ye na boyengebeni wana ntango ezali naino. Ete bákoka kosála ntolo na Ye monyuku na bango ya motó liboso mokili ekufa na móto.

3. Makolo ya Motako.

"Mpe makolo na Ye ezalaki lokola motáko, oyo euti kobimisama na litumbu na móto." Motako eyebani mpo na makasi na yango. Ezali na eloko moko te oyo eyebani oyo okoki kosangisa na yango mpo na kolembisa yango. Kasi motako oyo ezali kolimbola makolo na Ye ezali ya kokamwa mingi koleka na boye ete elongi momekano ya litumbu ya móto, momekano oyo moto mosusu aleki na yango te. Mpe yango ezali mpenza solo. Mpo motako etalisi kosambisama ya Nzambe: kosambisama oyo Nzambe azwaki mpe akokisaki yango. Yoane 3: 14-19,

"Lokola Mose atombolaki nyoka na esobe, ndenge moko mpe Mwana na Moto asengeli kotombolama:

Mpo ete moto nyonso oyo andimi Ye akufa te, kasi azala na bomoi ya seko.

Mpo Nzambe alingaki mokili mingi, ete Apesaki Mwana na ye mobotami-bobebe-moko ete moto nyonso oyo akondima Ye abebisama te kasi ázala na bomoi na seko.

Mpamba te Nzambe atindaki Mwana na Ye na mokili mpo na kokweisa mokili te; kasi mpo ete mokili na nzela na Ye ekoka kobikisama.

Ye oyo andimeli Ye akweisami te, kasi ye oyo azali kondima te asili kokweisama, mpamba te andimi Nkombo ya Mwana se moko ya Nzambe te.

Mpe kokweisama yango ezali ete pole eyaki na mokili, kasi bato balingaki molili na esika ya pole, mpamba te misala na bango ezalaki mabe.

Mituya 21: 8-9,

"Bongo Yawe alobaki na Mose ete, "Misalelá nyoka ya móto, mpe tyá yango na nzete: mpe ekosalema ete moto nyonso oyo aswami, ntango akotala yango, akozala na bomoi.

Bongo Mose asalaki nyoka ya motako, mpe atiaki yango na nzete, bongo esalemaki ete moto nyonso oyo aswamaki na nyoka, ntango azalaki kotala nyoka ya motako, azalaki kobika."

Yisalaele asumukaki. Lisumu esengelaki kosambisama. Na bongo Nzambe apesaki etinda na Mose ete atya nyoka ya motako na nzeté, mpe ye oyo atalaki abikisamaki na etumbu ya lisumu na ye.

Nyoka ya motako likolo na nzeté ezalaki elilingi ya lisumu oyo esalemaki na Elanga na Edene, epai nyoka epengwisaki Eva, mpe amemaki ye ásala lisumu. Motako ezali kolobela kosambisama, ndenge tozali komona yango na etumbelo ya motako, esika etumbu mpo na lisumu ezalaki kokweya likolo na mbeka oyo etyamaki likolo na etumbelo. Ntango Nzambe asambisaki Yisalaele mpo na masumu na ye na mikolo ya Eliya, Akangaki mbula mpe lolaoyo ezalaki kopela ekomaki lokola motako. Sikawa na elilingi oyo tozali komona ete nyoka likolo na nzeté ezali kotalisa lisumu oyo esili kosambisama, mpo yango esalemi na motako, ezali kotalisa ete kosambisama ya Nzambe asilaki kokweya likolo na lisumu. Bongo, moto nyonso oyo atalaki nyoka na nzeté, mpe andimaki ndimbola na yango, abikisamaki, mpo ezalaki mosala ya lobiko ya Nkolo.

Nyoka likolo na nzeté ezali etaliseli ya mosala oyo Yesu ayaki kokokisa awa na mabele. Akómaki nzoto mpo na kozwa likolo na Ye moko etumbu ya Nzambe mpo na lisumu. Moboko ya etumbelo ya mbeka ezalaki motako ya makasi, oyo ezalaki elilingi ya Mwana na Mpate oyo abomamaki liboso na kozalisama ya mokili. Kosambisama esilaki kokweya likolo na Ye ntango naino basumuki ezalaki te. Lobiko ezali mobimba ya Nkolo, Anyataki vinyo ya nkanda makasi ya Nzambe bobele Ye moko. Bilamba na ye bizalaki motane makasi na makila na Ye moko. Litumbu ya móto ya bosambisi ya bosembo mpe nkanda ya Nzambe ezalaki eteni na Ye. Ye moyengebene, Anyokwamaki mpo na bato oyo bazángi bosembo.

"Obongi, Ee Mwana Mpate na Nzambe, mpo Osikoli biso na makila na Yo moko."

"Azokisamaki mpo na masumu na biso, Atutamaki mpo na mabe na biso, etumbu oyo eyeiseli biso kimia etiamaki likolo na Ye, mpe na mapipi na Ye tobikisami." Nkolo atye mabe na biso nyonso likoló na Ye. Anyokwamaki lokola moto ata moko te atikala konyokwama bongo. Ata liboso na ekulusu, nzoto na Ye ebimisaki matangá minene ya motoki lokola makila, mpo na mpasi makasi ya konyokwama oyo ezalaki liboso, makila mpenza ekabwanaki na kati ya misisa na Ye. Luka 22: 44,

"Mpe wana Azalaki kati na somo monene, Abondelaki na molende mingi mpe motoki na Ye ezalaki lokola matangá minene ya makila oyo ezalaki kokweya na mabele."

Kasi mokolo moko, makolo wana ya motako ekotelema na mabelé. Boye Ye akozala Mosambisi ya mokili mobimba, mpe Akosambisa bato na boyengebene mpe na bosembo. Mpe moto moko te akokima kosambisama yango. Moko te akoki komilongola na esambiselo wana. Bakobongola yango te. Ye oyo azali mabe atikala mabe naino; ya oyo azali mbindo atikala na mbindo naino. Oyo Abongwanaka te Akobongwana te na ntango wana, mpo atikala kobongwana ata moke te mpe akobongwana ata mokolo moko te. Makolo wana ya motako makonyata monguna. Makoboma motemeli ya Klisto, nyama, elilingi mpe makambo nyonso ya mbido oyo ezali liboso na Ye. Ye akoboma miango ya mangomba oyo esaleli Nkombo na Ye kaka mpo na kobebisa nkembo na yango mpe Akonyata bango elongo na motemeli na Klisto. Bato nyonso ya mabe, bato oyo bandimaka Nzambe te, bato oyo bayebi te soki Nzambe azali to azali te, bato oyo bandimaka makambo ya sika, bato oyo balingaka bonsomi ya mabe, bango nyonso bakozala wana. Liwa, lifelo, mpe nkunda ekozala wana. Iyo, ya solo. Mpamba te ntango Akoya, babuku ekofungwama. Ezali ntango wana nde lingomba ya móto te mpe mpio te ná baseka mitano ya boléma bakomonana. Akokabola ba-mpate na ba-ntaba. Ntango Ye akoya Akokamata bokonzi, mpo ezali ya Ye, mpe elongo na Ye ekozala na bankóto mbala nkóto zomi: Mwasi na Ye ya Libala oyo akoya kosalela Ye. Nkembo! Oh, ezali sikawa, to ata mokolo moko te. Bobongola mitema liboso ete ntango eleka. Bolamuka longwa na bakufi mpe boluka Nzambe, mpo na kotondisama na Molimo na Ye, soki te bokozanga bomoi na seko. Bosala yango sikawa wana ntango ezali.

4. Mongongo na Ye Ezalaki lokola Mongongo ya Mai Monene.

Sikawa, mai ezali kotalisa nini? Boyoka yango na Emoniseli 17: 15,

"... Mai oyo omonaki ... ezali bato, ebele ya bato, bikólo mpe nkota."

Mongongo na Ye ezalaki lokola lokito ya ebele ya bato oyo bazali koloba. Ezali nini? Ezali kosambisama. Mpamba te yango ezali mingongo ya ebele ya batatoli, baoyo na nzela ya Elimo Santu, bapesaki litatoli na ntina na Klisto mpe bateyaki nsango malamumu na Ye kati na bileko. Ekozala mongongo ya moto nyonso oyo na kosambisama ekotelemela mosumuki oyo aboyaki koyoka likebisi. Mingongo ya batindami nsambo ekoyokana makasi mpe polele. Batei wana ya sembo oyo bateyaki nguya ya kobikisa ya Yesu, oyo bateyaki libatisi na mai na Nkombo na Yesu, oyo bateyaki kotondisama mpe nguya ya Molimo Mosantu, baoyo batikalaki ná Liloba koleka bomoi na bangomei; bango nyonso bazalaki mongongo ya Yesu Klisto na nzela ya Molimo Mosantu na boumeli ya bileko. Yoane 17: 20,

"Nazali kobondela kaka mpo na bango te, kasi mpe mpo na baoyo bakondimela Ngai na nzela ya liloba na bango."

Bosila kokanisa boni ezali nsomo mpo na moto komemama kozanga lisungi esika mai ekweyaka likolo na mabanga? Bokanisa sikawa na ntina ya konguluma ya mai wana ntango moto yango azali kopusana na ntembe te penepene na libebi na ye. Mpe kaka bongo nde mokolo ya kosambisama ezali koya, ntango konguluma ya ebele ya mingongo ekokweisa yo mpo ete ozangaki kokeba liboso na ntango koleka. Botya likebi mpenza na ntango oyo. Mpo na ngonga oyo makanisi na bino ezali kokomama na lola. Kuna makanisi na bino ezali koloba makasi koleka maloba na bino. Lokola Mofalisai oyo alobi mingi mpenza na monoko na ye, kasi ayokaki Nkolo te, motema na ye ebebaki mpe ekómaki mabe kino ntango elekaki, ata sikawa oyo ekoki kozala libyangi na yo ya nsuka mpo na koyoka Liloba mpe koyamba yango mpo na Bomoi na seko. Ngonga ekosila koleka ntango okobelema na konguluma ya ebele ya mingongo ya kosambisama mpe ya libebi.

Kasi, bino bosilá nde komona boni makéléle ya mai ekoki kozala kitoko mpe epesaka kimya na motema? Nalingaka kolóbo, bongo nalingaka koluka esika oyo mai ezali kobetabeta na mongongo ya nse. Nakoki

bobele kolala na mokongo mpe koyoka yango kotondisa motema na ngai na kimia, na esengo mpe na bosepeli. Boni nazali na esengo ete lóngo na ngai ezali na esika ya kopema, kuna mongongo ya Nkolo ezali koloba na ntina na kimia, lokola Liloba ya mai ya bokabwani esakoli. Boni tosengeli kozala na botondi mpo na koyoka mongongo na Ye ya bolingo, ya lisungi, ya litambwisi mpe ya libateli. Bongo mokolo moko tokoyoka mongongo moko wana ya bopolo koloba, na kosambisama te, kasi mpo na koyamba biso baoyo masumu na biso elimbisami na makila na ye, biso oyo bomoi na biso etondisamaki na Molimo, mpe botamboli na biso ezalaki kati na Liloba. Eloko nini ekoki kozala na motuya mingi koleka koyoka ebele ya mingongo ya boyambi mpe kovingama na ebele ya bato wana oyo bandimaki mpo na Bomoi na seko? Oh, eloko moko te ekokani na yango. Nabondeli ete báyoka mongongo na Ye mpe bóyeisa mitema na bino makasi te, kasi báyamba Ye lokola Mokonzi na bino.

Oh, soki bobele bokoki komona yango. Ezalaki mai nde ebomaki mokili, kasi ezalaki bobele mai yango nde ebikisaki Nowa mpe lisusu ebikisaki mokili mobimba mpo Nowa. Báyoka mongongo na Ye, mongongo ya basali na Ye, wana ezali kobenga bato na kobongola motema mpe na bomoi.

5. Na Loboko Na Ye Ya Mobali Ezalaki Na Minzoto Nsambo.

"Mpe Azalaki na minzoto nsambo na loboko na Ye ya mobali" Sikawa, na ntembe te molongo ya ntuku mibale esili koyebisa biso oyo minzoto nsambo ezali. "Mpe libombami ya minzoto nsambo ezali banje (batindami) ya mangomba nsambo." Tokoki kosala libunga na likambo moko te, lokola Ye azali kolimbolela biso yango. Minzoto nsambo oyo ezali batindami na bileko nsambo oyo ezali kolandana ya lingomba. Batangi bankombo na bango te. Elobami bobele ete bazali nsambo, moko mpo na eleko mokomoko. Kobanda na Eleko ya Efese kino na Eleko oyo ya Laodikia, motindami moko na moko amemaki nsango ya bosolo epai na bato, kozangaka ata moke te kobatela yango lokola Liloba ya Nzambe mpo na eleko wana ya lingomba. Moko na moko akangamaki na yango. Batikalaki ngwi kati na bosembo na bango epai na pole ya ebandeli. Wana eleko moko na moko ezalaki kokende mosika na Nzambe, motindami na Ye ya sembo azalaki kozongisa eleko yango na Liloba. Makasi na bango ezalaki kouta na Yawe; soki te balingaki ata moke te kokoka kopekisa mbonge. Bazalaki kobatelama na maboko na Ye, mpamba te eloko moko te ekokaki kolongola bango na maboko na ye, mpe eloko moko te ekokaki kokabola bango na bolingo ya Nzambe, ezala maladi, likama, bolumbu, nzala, mopanga, bomoi to liwa. Bamipesaki solo epai na Ye mpe babatelamaki na nguya na Ye nyonso. Bamitungisaki te na ntina na minyoko oyo eyaki na nzela na bango. Mpsi mpe kotyolama ezalaki bobele ntina ya kopesa Nzambe nkembo mpo ete batangamaki lokola babongi konyokwama mpo na Ye. Mpe na botóndi mpo na lobiko na Ye, bapelaki na pole ya bomoi na Ye mpe bamonisaki bolingo, motema molai, bopolo, komipekisa, boboto mpe bosembo na Ye. Mpe Nzambe asungaki bango na bikamwa, bilembo mpe makamwisi. Bafundaki bango ete bazalaki bilandalanda, mpe batúntuki. Bakweisamaki na bibongiseli mpe na batyolamaki, kasi batikalaki sembo na Liloba.

Ezali mpsi te kotelema ngwi mpe kotikala sembo na endimeli moko boye. Ezali pete, mpo ete diabulu azali mpenza nsima na nyonso wana. Kasi ezali eloko mosusu kotikala sembo na Liloba na Nzambe, mpe kozonga na oyo Liloba ebimisaki liboso, nsima na Pantekote.

Eleki mwa mikolo, moto moko alobaki na ngai ete lingomba Katoliko ya Loma esengelaki kozala lingomba ya solo mpo ete yango etikalaki na ba mbula oyo nyonso sembo na mateya na yango, mpe ekobaki kokola mpe kobongwana te. Ezali bongo ata moke te. Lingomba nyonso oyo esimami na letá, mpe ezali na endimeli na yango moko oyo ezali ata Liloba te, mpe ezali na mosala moko te oyo emonisami mpo na koningisa diabulu, na ntembe te ekoki na yango kokoba. Wana ezalaki te likambo oyo esengamaki. Kasi ntango okanisi na ntina na etonga moke wana ya bandimi oyo bakatamaki na mosumáne, baleisamaki na bankosi, banyokolamaki mpe babenganamaki bipai na bipai, kasi ata bongo batikalaki sembo na Liloba - sikawa na ntembe te yango esengelaki kozala Nzambe. Ndenge nini babikaki na etumba na bango ya kondima mpe bakobaki na bomoi : YANGO ezali likamwisi.

Mpe libondisi oyo ezali kaka mpo na batindami ya bileko nsambo na lingomba te. Mondimi nyonso ya solosolo azali kati na loboko na Nzambe mpe akoki kobenda uta na bolingo mpe nguya na Ye, mpe kozwa litomba nyonso oyo Nzambe azali kopesa na mondimi. Oyo Nzambe apesaka motindami, mpe lolenge Apambolaka mpe Asalelaka motindami, ezali ndakisa mpo na bandimi banso ya bolamu mpe kobatelama na Ye na binama NIONSO ya nzoto na Ye. Amen.

6. Mopanga Mopeli Bipai Mibale.

"Mpe uta na monoko na Ye mopanga mopotu mopeli bipai mibale ebimaki." Na Baebale 4: 12, "Mpo ete liloba na Nzambe ezali na bomoi mpe na nguya mpe na mopotu koleka mopanga mopeli na ngámbo mibale mpe ekotaka kino kokabola bomoto na kati mpe molimo, mpe mikuwa mpe mafuta na yango, mpe ezali kososola makanisi mpe mikano ya motema."

Mopanga mopotu mopeli na ngambo mibale ebimaki na monoko na Ye, yango ezali LILOBA NA NZAMBE. Emoniseli 19: 11-16,

"Mpe namonaki lola efungwami, mpe talá mpunda moko ya mpembe; mpe Ye oyo

afandaki likolo na yango abengamaki Sembo mpe Solo, mpe azali kobunda mpe kosambisa na bosembo.

*Miso na Ye ezalaki lokola móto oyo ezali kopela, mpe na motó na Ye ezalaki na mitole mingi; mpe Azalaki na nkombo moko ekomami, oyo moto moko te ayebaki, kasi Yemei.**

Mpe alataki elamba oyo ezindi na makila: mpe Nkombo na Ye ebengami Liloba Na Nzambe.

Mpe mampinga ya lola ezalaki kolanda Ye likolo na bampunda ya mpembe, balataki bilamba ya lini ya malamú, ya mpembe mpe ya peto.

Mpe na monoko na Ye mopanga moko ya mopotu ebimaki mpo na kobeta mabota: mpe akoyangela bango na lingenda ya ebende; mpe Ye akonyata ekamwelo ya vinyo na kongala na nkele ya Nzambe Mozwi-na-Nguya-Nyonso.

"Na elamba na ye mpe na ebelo na ye, nkombo moko ekomami : MOKONZI NA BAKONZI MPE NKOLO NA BANKOLO."

Yoane 1: 48,

"Natanaele alobaki na Ye ete: "Oyebi ngai uta wapi?" Yesu ayanolaki mpe alobaki na ye ete: "Liboso ete Filipe abengaki yo, wana ozalaki na nse ya nzete ya mosuke, Namonaki yo."

Yango wana. Ntango Akoya, Liloba wana ekotemela bikólo nyonso mpe bato nyonso. Mpe ata moto moko te akozala na makoki ya kotelema yango. Ekomonisa makambo oyo ezalaki na motema ya moto nyonso ndenge asalaki epai ya Natanaele Liloba na Nzambe ekomonisa nani asalaki mokano na Nzambe mpe nani asalaki yango te. Ekotalisa polele misala ya sekele ya moto nyonso mpe mpo na nini asalaki yango. Ekokabola. Yango elobami na Baloma 2: 3,

"Bongo yo, moto oyo osambisaka bato oyo basalaka makambo ya ndenge wana, mpe ozali kosala yango, okanisi ete okokima etumbu ya Nzambe?"

Na nsima, ekobi na koloba ndenge nini Nzambe akosambisa bato. Yango oyo na molongo ya 5 kino na 11. Motema makasi oyo ezangi kobongwana ekosambisama. Misala mikosambisama. Bakosambisama mpo na makambo oyo ezali kotinda bato básala yango. Ekozala na koponapona liboso na Nzambe te; kasi bato nyonso bakosambisama na Liloba yango, moto moko te akokima yango. Baoyo bayokaki kasi baboyaki kotosa, bakosambisama na kolanda makambo oyo bayokaki. Baoyo batikalaki na kati na yango mpe balobaki ete bandimaki yango, kasi babikaki yango te, bakosambisama. Sekele nyonso ekobima na polele mpe ekoganga uta na likoló ya bandako. Oh, na ntango wana nde tokososola mpenza makambo oyo eleká. Na bileko nyonso, libombami moko te ekotikala.

Kasi boyebi ete Ye azali komonisa basekele ya mitema ya mibali mpe ya basi na eleko oyo tozali kobika kati na yango? Nani mosusu akoki komonisa basekelé ya mitema longola kaka Liloba, Ye moko? Baebele 4: 12,

"Mpo ete liloba na Nzambe ezali na bomoi mpe na nguya, mpe ezali na mopotu koleka mipanga nyonso mipeli bipai mibale, mpe ekotaka kino kokabola bomoto na kati mpe molimo, mpe mikuwa ná mafuta na yango, mpe ezali kososola makanisi mpe mikano ya motema".

Ezali Liloba. Ezali kokokisa makambo oyo mpo na yango Etindamaki, mpo Yango (Liloba) etondi na nguya. Ezali Molimo kaka moko oyo ezalaki kati na Yesu (Liloba) oyo ezali lisusu na lingomba na eleko oyo ya nsuka lokola elembo ya nsuka, oyo ezali koluka kobenda bato mosika na kosambisama, mpo ete baoyo baboyi Ye (Liloba) basili kosambisama, mpo bazali lisusu kobaka Ye na ekulusu. Baebele 6:6,

"Soki bakokweya mosika, ezali mpasi mpo na kozongisa bango lisusu na kobongola motema, mpo ete bazali lisusu kobaka Mwana na Nzambe na ekulusu mpo na bango moko mpe bazali koyokisa ye nsani polele."

Sikawa Polo alobaki ete Liloba eyaki na nguya lokola mpe na mongongo. Liloba oyo eteyamaki, ezalaki komimonisa mpenza yango moko. Lokola mopanga ya móto oyo ezali kokata, ekotaki na lisosoli ya bato, mpe lokola mbeli ya monganga ya lipaso, ekataki bokono mpe esikolaki bakangami. Bisika nyonso oyo bandimi wana ya liboso bakendaki, "bazalaki koteya Nsango Malamú (Liloba) mpe Nzambe atatolaki Liloba yango na bilembo oyo elandaki." Babeli babikisamaki, milimo mabe babenganamaki, mpe bazalaki koloba na minoko ya sika. Oyo wana ezalaki Liloba kati na mosala. Liloba yango ekweyá ata moke te na minoko ya Baklisto oyo bandimaka. Mpe na eleko oyo ya nsuka, ezali makasi mpe na nkembo koleka na kati ya Mwasi na libala-Liloba, ya solosolo. Ee etonga moke, bino mwa ndambo ya bato moke, bókangama na Liloba, bótondisa monoko mpe motema na bino na yango, mpe mokolo moko, Nzambe akopesa bino bokonzi.

7. Elongi Na Ye Lokola Moi.

"Mpe elongi na Ye ezalaki lokola moi ntango ezali kongenga na makasi na yango."

Matai 17: 1-13,

"Mpe nsima ya mikolo motoba, Yesu akamataki Petelo, Yakobo mpe Yoane ndeko na ye, mpe Amemaki bango mosika, likolo na ngomba molayi,

Mpe abongwanaki liboso na bango, mpe elongi na Ye engengaki lokola moi, mpe bilamba na Ye bikomaki mpεmbε lokola pole.

Mpe talá, Mose ná Eliya bamonanaki na bango, bazalaki kosolola na Ye.

Bongo Petelo alobaki na Yesu: 'Nkolo, ezali malamú mpo na biso kozala awa; soki olingi, nakotonga awa mingombo misato; moko mpo na Yo, moko mpo na Mose, mpe moko mpo na Eliya.

Wana azalaki naino koloba, talá, Lipata ya kongenga ezipaki bango; mpe talá mongongo moko ebimaki na lipata elobaki ete: Oyo azali Mwana na Ngai ya bolingo, kati na Ye nde Nasepeli mingi; boyoka Ye.

Mpe ntango bayekoli bayokaki mongongo yango, bakweyaki bilongi na nse, mpe babangaki makasi.

Kasi Yesu ayaki, asimbaki bango mpe alobaki ete : Bótelema, bóbanga te."

Mpe ntango batombolaki miso, bamonaki moto te, longola se Yesu.

Mpe wana bazalaki kokita ngomba, Yesu apesaki bango etinda oyo: Boyebisa moto moko te makambo oyo bomoni, kino tango Mwana na Moto akosekwa kati na bakufi.

Bongo bayekoli na Ye batunaki ye: "Bongo mpo na nini bakomeli balobi ete Eliya asengeli koya liboso?"

Mpe Yesu azongiselaki bango ete : Solo Eliya akoya liboso mpe akobongisa makambo nyonso.

Kasi nalobi na bino ete Eliya asilaki koya mpe bayebaki ye te, kasi basalaki ye nyonso oyo bango balingaki. Ndenge moko mpe, Mwana na Moto akonyokwama na maboko na bango.

Bongo bayekoli basosolaki ete alobaki bango mpo na Yoane Mobatizi."

Sikawa na Matai 16:28, na ebandeli ya Matai 17:1-13, Yesu alobaki ete,

"... Ezali na bato mosusu oyo batelemi awa, oyo bakokufa te kino bakomona Mwana na Moto koya kati na Bokonzi na Ye.

Mpe bantoma wana misato bamonaki yango mpenza - molóngó ya koya na Ye ya mibale. Bamonaki ndenge Abongwanaki kuna likoló ya ngomba. Bilamba na Ye ekomaki pembe makasi mpenza, mpe elongi na Ye engengaki lokola moi engengaka na nzánga. Mpe ntango amonanaki kuna, Mose ná Eliya batelemaki na ngámbo moko mpe mosusu na Ye. Ezali mpenza ndenge wana nde akoya lisusu. Ya solo, Eliya akoya liboso mpe akozongisa mitema ya bana (mwasi na libala) na Malakisi ya Bantoma ya Liloba oyo batata bazalaki na yango. Malaki 4:5-6,

Tala, nakotindela bino Eliya mosakoli liboso na boyei ya mokolo monene mpe ya nsomo ya Nkolo.

Ye akozongisa mitema ya batata epai ya bana, mpe mitema ya bana epai ya batata na bango, noki Naya mpe nabeta mokili na elakeli mabe."

Yisalaele esili kokóma ekólo. Lelo oyo, ekólo yango ezali na mapinga na yango, basoda ya mai, pósita, benbele, mpe makambo nyonso oyo etali bokambami ya ekólo. Kasi esengeli naino ete Likomi oyo ekokisama, yango elobi : "... to ekolo ekobotama nde na mbala moko?..." Yisaya 66:8. Etikali moke, mokolo yango ezali koya. Nzete ya mosuke ebimisi nkasa. Yisalaele bazali kozela Masiya. Bazali kozela ete bámona Ye, mpe bilikya na bango elingi kokokisama. Yisalaele ekobotama lisusu na Molimo, mpamba te Pole na ye mpe Bomo na ye ekomi pene na komonisama epai na ye.

Kati na Emoniseli 21: 23,

Engumba yango ezali na bosenga ya moi te to sanza te mpo na kongengisa yango, mpo nkembo ya Nzambe engengisaka yango, mpe Mwana na Mpate azali pole na yango.

Oyo ezali Yelusaleme ya Sika. Mwana mpate akozala na kati ya engumba yango, mpe na ntina ya bozali na Ye, bosenga ya pole ekozala te. Moi ekobima te mpe ekongenga kuna te, mpo Ye Moko azali moi mpe pole na yango. Bikólo oyo ekoya na kati na yango bakotambola na pole na Ye Bozali na esengo te ndenge mokolo yango ekómi pene? Yoane amonaki mokolo yango koya. Ata boye, Nkolo Yesu, yaka noki!

Malaki 4: 1-3,

Mpo tala, mokolo ezali koya, oyo ekozikisa lokola fulu ya móto; mpe bato nyonso ya lofundu, mpe baoyo nyonso basalaka mabe, bakozala lokola matiti ya kokawuka; mpe mokolo oyo ezali koya ekozikisa bango, elobi Nkolo na bibebe, ete ekotika bango ata mosisa te to etape te.

Kasi mpo na bino baoyo bobangaka Nkombo na Ngai, moi ya bosembo ekobima, oyo ezali na lobiko na mapapu na yango; mpe bokobima mpe bokopumbwa lokola bana ya ngombe oyo babimisi na lopango.

Mpe bokonyata bato mabe, mpamba te bakozala putulu na nse ya makolo na bino na mokolo oyo Nazali kobongisa; Nkolo na bibebe alobi bongo."

Yango wana lisusu. MOI kongaláká na makasi na yango nyonso. Oh, makasi ya Mwana na Nzambe kongengáká katikati na bitemeli nsambo ya miinda, ya wolo. Ye wana Atelemi, Mosambisi, Ye oyo anyokwamaki mpe akufaki mpo na biso. Amemaki nkanda ya kosambisama na Nzambe likolo na Ye moko. Anyataki na ekamwelo ya vinyo ya nkanda makasi ya Nzambe Ye moko. Ndenge tolobaki yango liboso, mpo na mosumuki mongongo na Ye ezali lokola makelele ya mai oyo ezali kosopana to makelele ya mbonge ya liwa oyo ezali kobeta na likoló ya mabongo ya mabanga. Kasi mpo na mosantu, mongongo na Ye ezali lokola lokito ya ebale oyo ezali koyemba na bopolo ntango ozali kolala na bopemi, na bosepele kati na Klisto. Kongengisáká likolo na biso lingengi na Ye ya bolingo, Azali koloba : "Bobanga te, Nazali Ye Oyo Azalaki, Oyo Azali, Oyo Akoya; Nazali Mozwi-na-Nguya-Nyonso. Longola Ngai, mosusu azali te. Nazali Alifa mpe Omega, NYONSO na yango. " Azali Fololo ya Lobwakú, Monzoto oyo Engengaka na Ntongo. Azali moto oyo aleki kitoko na nkoto zomi mpo na molimo na ngai Ee, mokolo wana monene ekómi pene mpe Moi ya Boyengebene ekobima ná lobiko na mapapu na Ye.

KLISTO MOLONGI

Emoniseli 1:17-18,

Ntango namonaki ye, nakweyaki na makolo na Ye lokola moto oyo akufi. Bongo atiaki loboko na Ye ya mobali likolo na ngai mpe Alobaki na ngai ete : Kobanga te! Ngai nazali moto ya Yambo mpe ya Nsuka;

Nazali Ye Oyo azali na bomoi; nakufaki, mpe tala nazali na bomoi libela na libela. Amen. Mpe nasimbi bafungola ya lifelo mpe ya liwa."

Moto moko te akokaki koyika mpiko na bopusi mobimba ya emonaneli wana. Bokasi na ye esilaki mpenza, Yoane akweyaki na makolo na Ye lokola nde akufi. Kasi loboko ya bolingo ya Nkolo esimbaki ye, mpe mongongo ya lipamboli elobaki, "Kobanga te. Kobanga te. Ngai nazali moto ya Yambo mpe ya Nsuka. Nazali Ye Oyo azali na bomoi, mpe nakufaki; mpe, talá Nazali na bomoi libela na libela." Mpo na nini kobanga? Kosambisama oyo ekweyaki likolo na Ye na ekulusu, na nkunda, mpe ntango Akitaki, ezalaki mpo na biso. Amemaki bozito mobimba ya mpota ya masumu, mpe na yango, etumbu ezali te sikawa mpo na baye bazali kati na Klisto Yesu. Bomoni, ndanga na biso ezali ete "Molobeli" na biso "azali" Mosambisi "na biso. Ye azali nyonso mibale "Molobeli" mpe "Mosambisi." Lokola Mosambisi, "likambo esili kokatama"-esili na yango. Yango wana, kokweisama ezali te sikawa. Mpo na nini lingomba esengeli kobanga? Elaka nini Ye atikala kozanga komonisa liboso na biso? Mpo na nini esengeli kobanga etumbu to liwa? Nyonso esili kolongama. Talá Molongi ya nguya. Talá Moto oyo alongi mokili oyo ezali komonana mpe oyo emonanaka te. Ezali te lokola Alesandala, oyo alongaki mokili wana azalaki na mbula ntuku misato na misato mpe azalaki lisusu na eloko ya kolóngá te, yango wana akufaki lokola moto ya masumu mpe ya bomoi ya mobulu. Ezali te lokola Napoléon, oyo alongaki mikili nyonso ya Mpótó, kasi nsukansuka balongaki ye na etumba ya Waterloo mpe atindamaki lokola na boloko na Elbe, mpo ete alongamaki. Kasi eloko moko te ekoki kolonga Klisto. Ye oyo akitaki amati sikawa likolo koleka nyonso, mpe epai na Ye epesameli NKOMBO oyo ezali likolo ya nkombo nyonso. Iyo, Alóngaki liwa, lifelo mpe nkunda, mpe Azali na ba-fungola na yango. Oyo ye afungoli efungolami, mpe oyo Akangi ekangami. Tokoki kobongola yango te. Molongi moko te azalaki liboso na Ye mpe mosusu azali te bobele Ye. Bobele Ye nde azali Mobikisi, Mosikoli. Azali Nzambe SE MOKO: mpe "Nkolo Yesu Klisto" ezali Nkombo na Ye.

"Kobanga te, Yoane. Kobanga te, etonga moke. Nyonso oyo Nazali, bino bozali basangoli na yango. Nguya na ngai nyonso ezali ya bino. Makasi na ngai nyonso ezali ya bino, wana Natelemi katikati na bino. Nayaki te mpo na komema kobanga mpe bozangi kolonga, kasi bolingo, mpiko mpe makoki. Nguya nyonso epesameli Ngai mpe ezali ya bino mpo ete bósalela yango. Yo lobá liloba mpe ngai nakokokisa yango. Ezali

boyokani na Ngai mpe ekoki kokweya ata moke te. ”

MINZOTO NSAMBO MPE BITELEMISELO-YA-MIINDA

Emoniseli 1: 20,

“Libombami ya minzoto nsambo oyo omonaki na loboko na Ngai ya mobali, mpe bitelemiselelo-ya-miinda nsambo ya wolo. Minzoto nsambo ezali banje (batindami) ya mangomba nsambo; mpe bitelemiselelo -ya-miinda nsambo oyo omonaki ezali mangomba nsambo.”

Tosili kososola bosolo ya mabombami mibale oyo. Oh, tomonisaki te soki bamemi-nsango nsambo wana bazalaki banani, kasi na lialisi ya Nzambe tokosala yango mpe libombami yango ekokokisama. Bileko nsambo, toyebi yango. Batángami kati na Liloba, mpe tokolobela likolo na moko na moko kino tokokóma na eleko oyo ya nsuka oyo tozali kobika kati na yango.

Kasi na botali moko ya nsuka mpo na bosukisi ya mokapo oyo, botála Ye ntango ateleme wana na katikati ya bitelemiselelo-ya-miinda ya wolo ná minzoto nsambo na loboko na Ye ya mobali. Oh, ezali kokamwisa komona Ye kotelema wana na Bonzambe na Ye oyo eleki Likolo. Ye azali Mosambisi, Nganganzambe, Mokonzi, Mpongo, Mwana-Mpate, Nkósi, Alifa, Omega, Ebandeli mpe Nsuka, Tata, Mwana, Molimo Mosantu, Ye Oyo Azalaki, Oyo Azali, Oyo Azali Koya, Mozwi-na-Nguya-Nyonso, NYONSO NA NYONSO. Ye wana, Mobandisi mpe Mosukisi. Mwana na Mpate wana Abongi. Amonisaki motúya na Ye na ndenge Asombaki lobiko na biso Ye Moko. Sikawa ateleme kati na nguya mpe nkembo na Ye nyonso elongo na biloko nyonso oyo bipesami epai na Ye lokola mosambisi.

Iyo, Ye wana Ateleme katikati na bitelemiselelo ya miinda, ná minzoto na loboko na Ye. Ezali butu, mpamba te na ntango wana nde tosalelaka miinda mpo na pole, mpe na ntango yango nde tomonaka minzoto kongenga mpe kotálisa pole ya moi. Mpe ezali molili. Lingomba ezali kotambola na kondima kati na molili. Nkolo na ye alongwe na mokili oyo kasi Molimo Mosantu azali kaka kongenga na nzela ya lingomba, kopesaka pole na mokili oyo ya kala oyo elakelami mabe na ntina na masumu. Mpe minzoto yango ezali mpe kotalisa pole na Ye.. Pole bobele moko oyo bazali na yango ezali pole na Ye. Ndenge molili ezali -ndenge malili ezali na molimo. Nzokande, wana Ye azali kokóta katikati na biso, ezali pole mpe molunge, bongo lingomba epesami nguya mpe na nzela na Ye, ezali kosala misala oyo Ye asalaki.

Oh, tika tokoka, lokola Yoane, komona Ye mwa moke. Lolenge nini ya bato tosengeli kozala, ntango kotelema liboso na Ye na mokolo wana!

Soki naino opesi bomoi na yo epai na Ye te, tika obongola motema na yo epai na Nzambe na ngonga oyo, mpe ofukamaka kaka na esika ozali, mpe osenga Ye bolimbisi ya masumu na yo, mpe okaba bomoi na yo epai na Ye. Na nsima, tokoluka kosolola na ntina na Bileko Nsambo ya Lingomba elongo. Mpe wana tokosala yango nazali kobondela ete Nzambe akosunga mosali oyo abongi te ete ámonisa Liloba na Ye epai na bino.



www.messagehub.info

Mateya eteyami na
William Marrion Branham
 “... Na mikolo ya mongongo...” Emoniseli 10:7